



# Komunikado

20 di òktober 2023

## CAft: "Tuma akshon pa fortifiká finansa públiko i ekonomia"

Oranjestad – For di 2021 ekonomia di Aruba ta kresiendo enormemente. Segun e último proyekshonnan di Fondo Monetario Internashonal (IMF) e ekonomia ta krese den 2023 ku 8 porshento. Pa 2024 ta ferwagt un kresementu di 3 porshento. E rekuperashon fuerte aki, kombiná ku medidanan fiskal, ta resultá den entradanan hopi mas haltu for di impuesto i primanan, ku anteriormente a keda presupuestá. E di bon aki ta supstansial, tantu pa e pais komo pa e otro entidatnan den e sektor kolektivo. Awor aki ta importante pa Aruba usa e momentum aki pa pone finansa públiko strukturalmente na òrdu i hasi e ekonomia mas resiliente. Esei ta posibel ora hiba un maneho presupuestario prudente, utilizá e entradanan inesperá pa redusí e debe públiko (83 porshento di e PIB na 2023) i hasi invershon ku ta produsí kresementu. Reforma struktural den salubridat i seguridat sosial tambe ta yuda hiba na mas resiliensia.

A entregá e proyekto di presupuesto na tempu. Esaki ta fortifiká e derecho presupuestario di Parlamento. Kontrali na e siklo presupuestario, e informashon tokante di ehkushon i responsabilisashon sí ta kedando atras. Ta premirá ku e surplus presupuestario di e sektor kolektivo lo ta basta mas haltu ku e norma di 1 porshento di PIB, komo konsekuensia di e entradanan inesperá den 2023. No opstante e posishon finansiero favorabel riba término kòrtiku, tin riesgonan grandi tambe. E gastunan di interes, ku ya tabata suma 16 porshento di e presupuesto, lo ta hopi mas haltu ku tabata presupuestá. Esaki ta pa motibu ku e refinansiamentu di e fiananan di sosten di likides ta mas karu. Esaki ta pone ku awor mas ku nunca nan ta pone preshon riba otro gastu i invershon nesenario, i kòntrol di gastu ta keda mes importante ku ya e tabata. Invershonnan ta nesenario pa hasi e ekonomia mas resiliente i subi e kapasidat di generá entrada.

### Impuesto

Den 2023 Aruba a pone e promé bon paso pa hasi su sistema fiskal mas fuerte ku e Plan Fiskal 2023. Sinembargo, e sistema di impuesto indirekto ta keda fragmentá, loke ta hasié innesesariamente kompleho. Kolegio di supervishon finansiero di Aruba (CAft) ta sigui enkurashá pa simplifiká e sistema di impuesto indirekto, konforme e Pakete Nashonal i e rekomendashonnan di IMF, i introdusí riba tèrmino kòrtiku Impuesto riba Balor Agregá (IBA/btw), ku a anunsiá anteriormente. Un sistema mas simpel lo benefisiá kumplimentu fiskal tambe. Ta importante pa Aruba oumentá kumplimentu fiskal pa garantisá un distribushon di peso mas hustu i krea espasio presupuestario adishonal pa mas invershon ku ta produsí kresementu.

### Kuido i seguridat sosial

Si no kambia maneho, desaroyonan demográfiko lo buta ku e gastonan di kuido i penshon di behes lo sigui oumentá, loke lo resultá den défisit den futuro. Pa kontrolá gastu den salubridat, Algemene Ziektekosten Verzekering (AZV) ta konsiderá un kuadro di gastu. En prinsipio, CAft ta na favor di un kuadro di gastu, di forma ku ora ekonomia krese, por akumulá surplus ku lo sirbi komo reserva den kaso



di kontratiempo ekonómiko. Ta importante sí pa e kuadro di gastu no ta demasiado amplio i ku ta apliká esaki estrictamente pa limitá kresemento grandi di gastunan di kuido. Hustamente awor ku tin surplus enorme, CAft ta rekomendá pa tuma medida pa kuido i seguridat sosial por sigui ta pagabel pa e generashonnan futuro.

[Fin di Komunikado]

**Fotógrafo:**

Erick Boeldak

**Teksto pa foto:**

E espektativa ta ku e surplus presupuestario di e sektor kolektivo lo ta basta mas haltu ku e norma di 1 porshento di PIB.

**Nota pa redakshon – no pa publikashon**

Kontakto na CAft:

Sekretariado Kolegio di supervishon finansiero di Aruba

Telefòn +5999 461-9081

Email [info@cft.cw](mailto:info@cft.cw)

Website [www.cft.cw](http://www.cft.cw)

Persona di kontakto pa prensa:

Jefka Alberto

Telefòn +5999 512-6861